

四庫全書

史部

欽定四庫全書

皇王大紀卷二十四

宋 胡宏 撰

三王紀

康王

車旗曰車王之五路一曰玉路錫樊纓十有再就建太
常十有二旂以祀金路鈎樊纓九就建大旂以賓同姓
以封象路朱樊纓七就建大赤以朝異姓以封革路龍
勒條纓五就建大白以即戎以封四衛木路前樊鵠

工毒

纓建大麾以田以封蕃國王后之五路重翟錫面朱總

厭翟勒面續

丘謂

總安車雕面鷩

於雞

總皆有容蓋翟車貝

面組總有握轡車組輓

阮無

有嬰

甲色

羽蓋王之喪車五乘

水車蒲蔽犬禊尾橐疏飾小服皆疏素車焚蔽犬禊素

飾小服皆素藻

子道

車藻蔽鹿淺禊革飾駟

莫江

車崔蔽然

禊髹飾漆車蕃蔽紆禊雀飾服車五乘孤乘夏篆卿乘

夏縵

旦莫

大夫乘墨車士乘棧車庶人乘役車凡良車散

車不在等者其用無常旗日月為常交龍為旂通帛為

旌

之延

雜帛為物熊虎為旗鳥隼為旟於龜蛇為旐全羽

為旒

以醉

析羽為旌王建太常諸侯建旂孤卿建旌大夫

士建物師都建旗各象其事州里各象其名家各象其
號節建天下之六卿山國用虎節土國用人節澤國用
龍節皆以金為之道路用旌節門闕用符節都鄙用管
節皆以竹為之舍王之會同之舍設桯蒲胡再重設
車宮轅門為壇壝宮棘門為帷宮設旌門無宮則共人
門次王大旅上帝則張氈案設皇邸朝日祀五帝則張

大次小次設重帟重案合諸侯亦如之師田則張幕設重帟重案諸侯朝覲會同則張大次小次師田則張幕設案孤卿有邦事則張幕設案凡祭祀張其旅幕張尸次射則張耦次几筵王大朝覲大饗射凡封國命諸侯王位設黼依依前南鄉設莞筵紛純之允加縹席畫純加次席黼純左右玉几祀先王昨席亦如之諸侯祭祀席蒲筵績純加莞席紛純右雕几昨席莞筵紛純加縹席畫純筵國賓于牖前亦如之左彤几甸役則設熊席右

漆几凡喪事設葦席右素几其柏席用萑蒲純諸侯則
紛純每敦一几凡吉事變几凶事仍几朝聘饗射燕飲
曰九儀辨諸侯之命等諸臣之爵以同邦國之禮而待
其賓客上公九命執桓圭九寸纁藉九寸冕九章建常
九旒樊纓九就貳車九乘介九人禮九牢其朝位賓主
之間九十步立當車軹擯者五人廟中將幣三享王禮
再裸而酢饗禮九獻食禮九舉出入五積三問三勞侯
伯七命侯執信圭伯執躬圭立當前疾擯者四人廟中

將幣三享王禮一裸而酢出入四積再問再勞其他皆以七為節子男五命子執穀璧男執蒲璧立當車衡擯者三人廟中將幣三享王禮一裸不酢出入三積一問一勞其他皆以五為節王之三公八命其卿六命其大夫四命及其出封皆加一等凡諸侯之適子誓於天子攝其君則下其君之禮一等未誓則以皮帛繼子男凡大國之孤四命執皮帛以繼小國之君出入三積不問一勞朝位當車前不交擯廟中無相以酒禮之其他皆

眡小國之君凡諸侯之卿各下其君二等以下及其大夫士皆如之其宮室車旗衣服禮儀各眡其命之數王將合諸侯則令為壇三成宮旁一門詔王儀南鄉見諸侯土揖庶姓時揖異姓天揖同姓及其擯之各以其禮公於上等侯伯於中等子男於下等其將幣亦如之其禮亦如之王燕則諸侯毛凡諸公相為賓王國五積三問皆三辭拜皆旅擯再勞三辭三揖登拜受拜送主君郊勞交擯三辭車逆拜辱三揖三辭拜受車送三還再

拜致館亦如之致殮如致積之禮及將幣交擯三辭車
逆拜辱賓車進答拜三揖三讓每門止一相及廟唯上
相入賓三揖三讓登再拜授幣賓拜送幣每事如初賓
亦如之及出車送三請三進再拜賓三還三辭告辟致
饗音雍餼還圭饗食致贈郊送皆如將幣之儀賓之拜禮
拜饗餼拜饗食賓繼主君皆如主國之禮諸侯諸伯諸
子諸男之相為賓也各以其禮相待也如諸公之儀諸
公之臣相為國客則三積皆三辭再受及大夫郊勞旅

擯三辭拜辱三讓登聽命下拜登受賓使者如初之儀
及退拜送致館如初之儀及將幣旅擯三辭拜送客辟
三揖每門止一相及廟唯君相入三讓客登拜客三辟
授幣下出每事如初之儀及禮私面私獻皆再拜稽首
君答拜出及中門之外問君客再拜對君拜客辟而對
君問大夫客對君勞客客再拜稽首君答拜客趨辟致
饗餼如勞之禮饗食還圭如將幣之儀君館客客辟介
受命遂送客從拜辱于朝明日客拜禮賜遂行如入之

積凡侯伯子男之臣以其國之爵相為客而相禮其儀亦如之凡四方之賓客禮儀辭命餼勞賜獻以二等從其爵而上下之凡賓客送逆同禮凡諸侯之交各稱其邦而為之幣以其幣為之禮凡行人之儀不朝不夕不正其主面亦不背客王合諸侯而饗禮則具十有二牢庶具百物備諸侯而饗禮長十有再獻王巡守殷國則國君膳以牲犢令百官百姓皆具從者三公眡上公之禮卿眡侯伯之禮大夫眡子男之禮士眡諸侯之卿禮

庶子壹眠其大夫之禮凡諸侯之禮上公五積皆眠飧
牽三問皆脩羣介行人宰史皆有牢飧五牢食四十簋
十豆四十鉶四十有二壺四十鼎簋十有二牲三十有
六皆陳饗餼九牢其死牢如飧之陳牽四牢米百有二
十筥醯醢百有二十壺車皆陳車米眠生牢牢十車車
乘有五簋車未眠死牢牢十車車三秬丁故反芻薪倍禾
皆陳乘禽日九十雙殷膳大牢以及歸三饗三食三燕
若弗酌則以幣致之凡介行人宰史皆有飧饗餼以其

爵等為之牢禮之陳數唯上介有禽獻夫人致禮八壺
八豆八簋膳大牢致饗大牢食大牢卿皆見以羔膳大
牢侯伯子男放是而殺者也凡諸侯之卿大夫士為國
客則如其介之禮國新殺禮函荒殺禮扎喪殺禮禍哉
殺禮在野在外殺禮凡賓客死致禮以喪用賓客若有
喪唯芻稍之受遭主國之喪則不受饗食受牲禮諸侯
適天子必告於祖奠于禩冕而出視朝命祝告于社稷
宗廟山川乃命國家五官而後行道而出告者五日而

編過是非禮也凡告用牲幣反亦如之諸侯相見必告于禰朝服而出視朝命祝史告于五廟所過山川亦命國家五官道而出反必親告于祖禰乃命祝史告至于前所告者而後聽朝而入曾子問曰諸侯旅見天子入門不得終禮廢者幾孔子曰四太廟火日食后之喪雨霑服失容則廢日食從天子救日各以其方色與其兵太廟火則從天子救火不以方色與兵曾子問曰諸侯相見揖讓入門不得終禮廢者幾孔子曰六天子崩太

廟火日食后夫人之喪雨露服失容則廢諸侯之聘禮
天子無介上公七介侯伯五介子男三介所以明貴賤
也君命使者夕幣于廟厥明使者釋幣于禩于行入朝
受圭及享束帛加璧受夫人之聘璋享玄纁束帛加琮
遂行君使士迺而請事于竟下大夫迎于郊卿勞夫人使
下大夫勞卿致館宰夫設餐七厥明賓皮弁入于次君
皮弁拜迎于大門之外卿為上擯大夫為承擯士為紹
擯以傳命君子於其所尊弗敢致敬之至也三讓而傳

命三讓而後入廟門三揖而後至階三讓而後升所以致尊讓也賓襲執圭致命褻奉束帛加璧享夫人如公醴賓賓北面以臣禮見公北面拜貺拜君命之辱以客禮受之所以致敬也公送賓于大門內問君及大夫勞賓及介賓請有事於卿大夫卿勞賓賓辭大夫奠鴈上介受公使卿大夫致饗餼賓朝服問卿卿受于祖廟夫人使下大夫歸禮公于賓一食再饗燕與羞俶獻無常數大夫於賓一饗一食君使卿皮弁還玉大夫還璋此

輕財重禮之義也公館賓賓辭請命于朝遂行公使卿
贈士送于竟聘享夫人之聘享問大夫送賓公皆再拜
使者反襁而入致命歸釋幣于門獻于禰凡四器者唯
其所寶以聘重禮也貨多則傷德幣美則沒禮若兄弟
之國則問大夫凡辭無常孫而說辭多則史少則不達
若使者聘而誤則主君弗親饗食以愧厲之子云君子
敬則用祭器故君子不以菲廢禮不以美沒禮故食禮
主人親饋則客祭主人不親饋則客不祭故君子苟無

禮則羹不食焉諸侯相見灌用鬱鬯無籩豆之薦大夫
聘禮以醕醢天子一食諸侯再大夫士三食力無數圭
璋特琥璜爵諸侯視朝大夫特士旅之五獻之尊門外
缶門內壺君尊瓦甒無甒天子諸侯之尊廢禁大夫士枌
禁君子曰無節於內者觀物弗之察矣欲察物而不由
禮弗之得矣故作事不以禮弗之敬矣出言不以禮弗
之信矣故曰禮也者物之致也先王之制禮也因其財
物而致其義焉爾是故先王尚有德尊有道任有能繼

世以立諸侯象賢也以官爵人德之殺也死而謚今也古者生無爵死無謚禮之所尊尊其義也失其義陳其數祝史之事也故其數可陳也其義難知也知其義而敬守之天子之所以治天下也射天子之制諸侯歲獻貢士於天子天子試之於射宮三公北面孤東面卿大夫西面諸侯北面射人詔相其法天子將祭必先習射於澤而後射於射宮其容體比於禮其節比於樂而中多者得與於祭反是者不得與於祭數與於祭而君有

慶數不與於祭而君有讓數有慶而益地數有讓而削地射之為言繹也或曰舍也繹者各繹已之志也故心平體正持弓矢審固則射中矣射者仁之道也求正諸已已正而後發發而不中不怨勝已者反求諸已而已矣故為人父者以為父鵠為人子者以為子鵠為人君者以為君鵠為人臣者以為臣鵠故射者各射已之鵠王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大

夫以三耦射一侯一獲一容樂以采蘋五節二正士以
三耦射豸侯一獲一容樂以采芣五節二正騶虞
者樂官備也之方狸首者樂會時也采蘋者樂循辭法也
采芣者樂不失職也孔子曰射者何以射何以聽循聲
而發發而不失正鵠者其唯賢者乎是故明乎其節之
志以不失其事則功成而德行立此天子所以養諸侯
兵不用而諸侯自為正之具也是故古者天子以射選
諸侯卿大夫射者男子之事也因而飾之以禮樂也內

志正外體直持弓矢審固然後可以言中此可以觀德
行矣君使士射不能則辭以疾言曰某有負薪之憂燕
古者諸侯之射也必先行燕禮卿大夫士之射也必先
行鄉飲酒之禮燕禮者所以明君臣之義也是故將燕
小臣戒與者尊兩方壺于東楹之西左玄酒南上公尊
瓦大南上尊士兩園壺于門西設洗于阼階東南罍力
東籩西膳籩在其北君席于阼階于上居主位也君獨
升立席上西面特立莫敢適之義也射人請賓君命某

賓入中庭君降一等而揖之禮之也小卿次上卿大夫次小卿士庶子以次就位於下設賓主飲酒之禮也使宰夫為獻主臣莫敢與君亢禮也不以公卿為賓而以大夫為賓為疑也明嫌之義也主人洗盥獻賓賓酬主人主人北面獻於公主人酢公酢賓公命下大夫二人媵爵酌觶之鼓公興以酬賓賓以旅酬卿大夫主人獻卿二大夫媵爵如初若賓若長唯公所酬以旅如初主人獻大夫工人升歌三終笙入三終間歌三終合樂三終

大師告樂備公許射人為司正命安卿大夫遂徹俎降

說

吐沽

屨升坐羞庶羞主人獻士及祝史小臣賓賡

以觚

音沽

于公公興唯所欲酬受者就席坐行之卒受者以爵

酬士士旅酌主人獻庶子遂獻左右正與內小臣無筭

樂賓出奏陔公不送君舉旅於賓及君所賜爵皆降再

拜稽首升成拜明臣禮也君答拜之禮無不答明君上

之禮也獻君君舉旅行酬而後獻卿卿舉旅行酬而後

獻大夫大夫舉旅行酬而後獻士士舉旅行酬而後獻

庶子俎豆牲體薦羞皆有等差所以明貴賤也鄉飲酒鄉飲酒之禮者所以明長幼之序也是故請賓及介必謀於先生主人席於東南僎席於東北賓於西北介席於西南衆賓之席不屬焉立賓以象天立主以象地設介僎以象日月設三賓以象三光主之以天地經之以日月參之以三光政教之本也六十者坐五十者立侍而聽政役六十者三豆七十者四豆八十者五豆九十者六豆牲用狗尊兩壺於房戶間斯禁有玄酒設洗于

東榮水東籬西籬所以奠爵及觶也獻用爵其他以觶
羹定主人拜迎賓于屏門之外三揖而后至階三讓而
后升主人肅賓及介而衆賓自從之至于門外主人拜
賓及介而衆賓自入貴賤之義別矣主人洗盥酌獻有
司薦脯醢音海賓升席乃設折俎賓祭脯醢奠爵取肺以
祭嘑加于俎祭酒興席末啐酒降席奠爵告旨卒爵賓
酢主人主人酬賓主人獻介不嘑不啐不告主人酢介
主人獻衆賓主人升賓即席如初自拜至拜洗拜受拜

送拜既獻酬辭讓之節繁及介省矣至於衆賓升受坐

祭立飲不酢而降隆殺之義辨矣工四人二瑟入升席

于堂簾歌三終鹿鳴四牡主人獻之笙入立堂下三終

南陔白華華黍主人獻之間歌三終魚麗由庚南有嘉魚合樂

三終鵲巢采芣采蘋工告樂備遂出一人揚觶主人作

相為司正焉知其能和樂而不流也司正請安賓復席

司正飲卒觶賓酬主人于阼階上主人酬介于西階上

介酬衆賓畢司正復位使二人酬賓介主人命請坐賓

辭以俎司正徹俎降說屨升坐乃羞無算爵無算樂賓
出奏陔主人拜還送于門外自賓酬主人主人酬介介
酬衆賓少長以齒終於沃洗者焉知其能弟長而無遺
矣自降說屨升坐羞爵無數飲酒之節朝不廢朝莫不
廢夕賓出主人拜送節文終遂焉知其能安燕而不亂
也五者足以正身安國矣彼國安而天下安故孔子曰
吾觀於鄉而知王道之易易也明日賓拜賜主人拜辱
乃息司正無介不殺羞唯所有徵唯所欲以告于先生

君子可也聘射之禮至大禮也質明而始行事日幾中而後禮成酒清人渴而不敢飲也肉乾人饑而不敢食也日暮人倦齊莊正齊而不敢懈惰非强有力者不能行也故勇敢强有力者將以行禮義也天下有事則用之於戰勝矣不用之於禮義戰勝而用之於爭鬪則謂之亂人刑罰行於國所誅者亂人也如此則民順治而國安也養老者人生十年曰幼學二十曰弱冠三十曰壯有室四十曰强而仕五十曰艾服官政六十曰耆指

使七十曰老而傳八十九十曰耄七年曰悼悼與耄雖有罪不加刑焉百年曰期頤

以友

大夫七十而致事若不得謝則必賜之几杖行役以婦人適四方乘安車自稱

曰老夫於其國則稱名越國而問焉必告之以其制一命齒於鄉里再命齒於族三命不齒族有七十者不敢先七十者不有大故不入朝若有大故而入君必與之揖讓而後及爵者人生五十始衰六十非肉不飽七十非帛不煖八十非人不煖九十雖得人不煖矣是故五

十而爵不從力政異耒杖於家養於鄉六十必宿肉杖
於鄉養於國不親學不與服戎七十貳膳杖於國養於
學達於諸侯不候朝君問則席不與賓客之事八十常
珍杖於朝君問則就之拜君命一坐再至月告存齊喪
之事弗及也一子不從政九十日有秩飲食不離寢天
子欲有問焉則就其室以珍從天子有命則使人受其
家不從政廢疾非人不養者一人不從政凡居鄉以齒
而老窮不遺朝廷同爵則尚齒凡父母在子雖老不坐

父之齒隨行兄弟之齒鴈行朋友不相踰輕任并重任
分班白者不提挈不以其任行乎道路見老者則車徒
辟君子耆老不徒行庶人耆老不徒食有虞氏皇而祭
服深衣以燕禮養國老於上庠養庶老於下庠夏后氏
収而祭服燕衣以饗禮養國老於東庠養庶老於西序
殷人哱而祭服縞衣以食禮養國老於右學養庶老於
左學周人冕而祭服玄衣兼用三代之禮養國老於東
膠養庶老於虞庠凡養老天子視學大昕鼓徵衆至然

後天子至乃命有司行事興秩節祭先師先聖焉有司
卒事反命始之養也適東序釋奠於先老遂設三老五
更羣老之席位焉適饌省醴養老之珍具遂發咏焉退
脩之以孝養也反登歌清廟既歌而語以成之也言父
子君臣長幼之道合德音之致禮之大者也下管象舞
大武大合衆以事達有神興有德也正君臣之位貴賤
之等焉而上下之義行矣有司告以樂闋王乃命公侯
伯子男及羣吏曰反養老於東序終之以仁也是故聖

人之記事也慮之以大愛之以敬行之以禮脩之以孝
養紀之以義終之以仁是故古之人一舉事而衆皆知
其德之備也古之君子舉大事必慎其終始而衆安得
不喻焉說命曰念終始典於學有虞氏貴德而尚齒夏
后氏貴爵而尚齒殷人貴富而尚齒周人貴親而尚齒
五帝憲三王有乞言五帝憲養氣體而不乞言有善則
記之為惇史三王亦憲既養老而後乞言亦徵其禮皆
有惇史凡三王養老皆引年天子巡狩諸侯待於境天

子先見百年者八十九者東行西行者弗敢過西行
東行者弗敢過欲言政者君就之可也虞夏殷周天下
之盛王也未有遺年者年之貴乎天下久矣次乎事親
也

皇王大紀卷二十四

欽定四庫全書

皇王大紀卷二十五

宋 胡宏 撰

三王紀

康王

喪葬曰古之葬者厚衣之以薪葬之中野不封不樹喪期無數後世聖人制衾冒棺擲使死者有終生者無憾歷夏商至周而禮節大備凡病革者內外皆掃寢東首於北牖下廢牀徹褻衣加新衣體一人男女改服屬纊

以俟氣絕男子不死於婦人之手婦人不死於男子之手君夫人卒於路寢大夫世婦卒於適寢士庶之妻皆死於寢天子死曰崩諸侯死曰薨大夫曰卒士曰不祿庶人曰死壽考曰卒短折曰不祿死冠曰兵送終之具六十歲制七十時制八十月制九十日脩惟絞衾衾冒死而後制復始終虞人狄人設階小臣復復者朝服天子以冕服復於太廟復於小寢大寢小祖大祖以乘車建綏復于四郊曰天子復矣自諸侯至於庶人各以其

服皆升自東榮中屋履危北面三號捲衣投于前司服受之降自西北榮復衣不以衣尸不以斂婦人復不以衽而凡復男子稱名婦人稱字復盡愛之之道也有禱

祠之心焉望反諸幽求諸鬼神之道也北面求諸幽之

義也唯哭先復復而後行死事主人羔裘玄冠者易之

筭纚徒跣扱上衽而交手哭水漿不入口心悵焉愴焉

愴焉愴焉故辟踊哭泣訃父兄命赴者赴於他國君曰

寡君不祿敢告執事夫人曰寡小君不祿太子曰寡君

之適子某死臣計於君曰君之臣某死父母妻長子曰
君之君某之某死大夫計於大夫士曰某不祿士計於
大夫曰某死浴尸帷堂天子張帟三重諸侯再重孤卿
大夫不重君設大盤大夫夷盤造氷馬士瓦盤扶君僕
人師扶右射人師扶左君薨以是舉浴尸殷人掘中雷
而浴毀竈以綴足周人浴以盆沐以盤楔齒用角柶綴
足以燕几君大夫士一也設牀檀如策君以簟席大夫
以蒲席士以葦席有枕襲一牀舍一牀遷尸于堂又一

牀君大夫士一也飯尸襲已正尸於牖下南首飯尸天子沐用黍諸侯用稷大夫士用稻舍尸用具天子九諸侯七大夫五士三飯用米貝弗忍虛也不以食道用美焉耳子坐於東卿大夫父兄子姓立焉有司庶士哭於堂下北面夫人坐於西內命婦姑姊妹子姓立焉外命婦率外宗哭於堂上北面君之喪為寄公國賓出大夫之喪為君命出士之喪於大夫不當斂則出出必徒跣

蘇氏扱衽拊心降自西階小斂三日小斂於戶內男女奉

尸夷于堂布絞縮者一橫者三君錦衾大夫縞衾士緇衾皆一是為夷衾夷衾質殺之裁猶冒也凡冒質長與手齊殺三尺衣十有九稱君陳衣于庭百稱大夫五十士三十主人即位袒說髦括髮婦人髻側瓜帶麻于房中

重重主道也殷主綴重焉周主重徹焉以脯醢奠曾子

曰始死之奠其餘閣也歟大斂於阼子弁經大結即位於

序端布絞縮者三橫者五布衿二衾君大夫士一也絞

衿如朝服絞一幅為三不辟衿五幅無統君錦冒黼殺

綴旁七大夫玄冒黼殺綴旁五士緇冒黼殺綴旁三小
斂大斂祭服不倒皆左衽結紱不紐卒斂宰告子馮之
踊夫人東西亦如之天子崩三日祝先服五日官長服
七日國中男女服三月天下服殯天子七日而殯諸侯
五日大夫士庶人三日夏后氏殯於東階之上殷人殯
於兩楹之間周人殯於西階之上在牀曰尸在棺曰柩
動尸舉柩哭踊無數惻怛痛疾悲哀志懣氣盛故袒而
踊之所以動體安心下氣也婦人不袒故發冑擊心爵

踊也君即位而為柁歲一漆之藏焉其色朱綠用雜金
錯大夫玄綠用骨士不綠天子之棺四重水兕革棺被
之其厚三寸杙棺一梓棺二四者皆周棺束縮二衡三
衽每束一外栢槨諸侯三重大夫士再重棺槨之間君
容祝大夫容壺士容甒無甫古者棺槨無度中古棺七寸
槨稱之自天子達於庶人天子龍輅而槨直為四阿
加斧于槨上畢塗屋諸侯輅正輪而設槨無四阿大夫以
幘攢塗不暨于棺士殯見衽塗上帷之設熬加魚腊音昔

於旁天子之喪官正授廬舍辨其親疎貴賤主人襲斬

衰帶經居於倚廬哭無時非喪事不言寢苦

舒

枕塊杖

而後能起為父苴杖為母削杖苴杖竹削杖桐也公侯

之喪諸達官之長杖父在為妻不杖不稽顙

桑

母在為

妻杖而不稽顙稽顙其贈也拜袒括髮去飾之甚也有

所袒有襲哀之節也拜稽顙哀戚之至隱也稽顙隱之

甚也為父與為長子稽顙大夫弔之雖總必稽顙拜而

后稽顙殷之喪拜也孔子曰顙乎其順也稽顙而后拜

周之喪拜也孔子曰傾乎其至也三年之喪吾從其至者或曰婦人為夫與長子稽顙銘旌書銘男子稱名婦人書姓與伯仲如不知姓則書氏曰某之柩自天子至于士一也置于西階上銘明旌也以死者為不可別已故以旗識之愛之斯錄之矣敬之斯盡其道焉耳莫朝莫日出夕莫逮日朔莫致盛焉薦新如之奠以素器以生者有哀素之心也唯祭祀之禮主人自盡焉耳豈知神之所饗亦以主人有齊敬之心也曾子問於孔子曰

大功可以與饋奠乎孔子曰自斬衰以下可也曰不以輕服而重相為乎曰非此之謂也天子諸侯之喪斬衰者奠大夫齊衰者奠士則朋友奠不足則取於大功以下者不足則反之曰廢喪服可以與於饋奠乎曰說衰與奠非禮也以擯相可也弔衾襚贈臨凡有弔者相者以入升堂致命子拜稽顙弔者出含者執璧將命子拜稽顙含者坐委于殯東南乃出襚似者執冕服致命子拜稽顙襚者下堂受爵弁服於門內雷受皮弁服於中

庭自西階受朝服自堂受玄端將命子皆拜稽顙委衣

於殯襚者出賵

鳳孚

者陳乘黃大路於中庭北軒執圭將

命子拜稽顙坐委於殯東南隅賵者出弔含襚賵臨皆

同日而畢事者也諸侯之相襚也以後路與冕服先路

褒衣不以襚知生者弔知死者傷知生而不知死弔而

不傷知死而不知生傷而不弔行弔之日不飲酒食肉

羔裘玄冠不以弔弔於葬者必執引若從柩

其又

及壙皆

執紼君遇柩於路必使人弔之婦人非三年之喪不踰

封而弔婦人送迎不下堂下堂不哭男子出寢門見人不哭其無女主則男主拜女賓于寢門內其無男主則女主拜男賓于阼階下子幼則以衰抱之人為之拜為後者不在則有爵者辭無爵者人為之拜在竟內則俟之在竟外則殯葬可也卿大夫疾君問之無筭在殯三往焉比葬不食肉比卒哭不舉樂士有疾問之在殯一往焉比葬不舉將往必先戒之主人具殷奠以俟于門外見馬首則先入門右君入即位于阼主人拜稽顙君

稱言視祝而踊主人踊卒奠先俟于門外送君拜稽顙
夫人弔於大夫士主人出迎如君夫人升堂即位主婦
降自西階拜稽顙于下夫人視世子而踊卒奠主婦送
于門內拜稽顙主人送於大門之外不拜明器既殯旬
而布材與明器竹不成用瓦不成沫木不成斲琴瑟張
而不平竽笙具而不和有鐘磬而無筍虞其曰明器神
明之也葬則置之墓中孔子謂為明器者知喪道矣備
物而不可用也哀哉死者而用生者之器也不殆於用

殉乎哉塗車芻靈自古有之明器之道也孔子謂為芻
靈者善謂為俑者不仁不殆於用人乎哉葬天子七月
而葬諸侯五月大夫士庶人三月凡葬卜宅兆卜日外
事用剛日內事用柔日旬之外曰遠某日旬之內曰近
某日喪事先遠日吉事先近日卜筮不過三卜筮不相
襲卜筮者先聖王之所以使民信時日敬鬼神畏法令
也所以使民決嫌疑定猶與也大夫之喪其卜也有司
麻衣布衰帶因喪屨緇布冠不縫占者皮弁如筮則史

練冠長衣以筮占者朝服凡聽卜有事於尸則去杖葬
有日啟殯設啟奠朝於祖其朝也順死者之孝心也其
哀離其室也故至於祖考之廟而後行殷祭而殯於祖
及葬毀宗躡行出于大門周朝而遂葬質明設遷祖之
奠奉柩載於柳車有虞氏之綏夏后氏之綢練殷之崇
牙周之璧翣飾棺君龍帷三池振容黼荒火黻三列素
錦褚加帷荒纁紐六齊五采五貝黼黻畫翣各二皆戴
圭魚躍拂池纁戴六纁披六大夫士視是以哀載銘旌

之車是為祥車祥車曠左遷柩南首設祖奠厥明遣奠
苞牲體載之天子九箇車九乘疏布輶四面有章置于
四隅諸侯七大夫五君執紼五百人皆銜枚司馬執鐸四
十有六人匠執羽葆御柩大夫執引者三百人執鐸四
人御柩以茅葬於北方北首三代之達禮也之幽之故
也端衰喪車無等大夫將葬弔於官及出命引之三步
則止如是者三君退朝亦如之衰次亦如之天子之曠
闕地為隧庶人縣棺而封三年之喪自天子達葬不為

雨止不封不樹喪不貳事自天子達於庶人殷人嘏而

葬周人弁而葬者與神交之道也曾子問於孔子曰葬

引至於塋

古銓

日食如之何孔子曰吾嘗從老聃

助葬

於巷黨及塋日有食之老聃曰丘止柩就道右止哭以

聽變既明反而後行曰禮也反葬而問之曰夫柩不可

以反者也日有食之不知其已之遲速則豈如行哉老

聃曰諸侯朝天子見日而行逮日而舍奠大夫使見日

而行逮日而舍夫柩不早出不暮宿見星而行者唯罪

人與奔父母之喪者乎日有食之安知其不見星也君

子行禮不以人之親店

始

患老聃云封弔虞封主人贈

以玄纁束帛弔殷既封而弔弔於壙作虞主其木用桑
祝先歸宿虞尸是故送形而往迎精而反歆主人主婦
室老為其病也君命食之也反哭升堂反諸其所作也
主婦入于室反諸其所養也周反哭而弔弔於家其弔
也哀之至也反而亡焉失之矣於是為甚孔子曰死民
之卒事也殷已慤吾從周既反哭有司以几筵舍奠於

墓左主人與有司視虞牲是日以虞易奠以吉祭易喪祭弗忍一日離也男男尸女女尸天子九虞諸侯七大夫五士三曾子問於孔子曰小功可以與於祭乎孔子曰自斬衰以下禮也曰不以輕喪而重祭乎曰天子諸侯之喪祭也不斬衰者不與祭大夫齊衰者與祭士祭不足則取於兄弟大功以下者曰相識有喪服可以與於祭乎曰總不祭又何助於人卒哭既虞卒哭天子九月諸侯七月大夫五月士三月報葬者報虞三月而后

卒哭既卒哭宰夫執木鐸以命于宮曰舍故而諱新禮
不諱嫌名二名不偏諱逮事父母則諱王父母不逮事
父母則不諱王父母君所無私諱大夫之所有公諱詩
書不諱臨文不諱廟中不諱夫人之諱雖質君之前臣
不諱也婦諱不出門大功小功不諱入竟而問禁入國
而問俗入門而問諱周人明日奉主于太廟祭從昭穆
是謂之祔自始虞至于祔必於是日也接不忍一日未
有所歸也虞杖不入於室祔杖不升於堂祔士大夫不

得祔於諸侯祔於諸祖父之為士大夫者其妻祔於諸祖姑妾祔於妾祖姑無妾祖姑者易牲而祔於女君可也其妻為大夫而卒而後其夫不為大夫而祔於其妻則不易牲妻卒而後夫為大夫而祔於其妻則以大夫牲諸侯不得祔於天子天子諸侯大夫可以祔於士士不攝大夫攝大夫唯宗子士不祔於大夫之昆弟無昆弟則從其昭穆雖王父在亦然王父死未練祥而孫又死猶是祔於王父也男子祔於王父則配女子祔於王

母則不配公子祔於公子婦之喪虞卒哭其夫若子主之祔則舅主之婦祔於祖姑祖姑有三人則祔於親者有父母之喪尚功衰而祔兄弟之殤

詩羊

則練冠祔於殤

稱陽童某甫不名神也祔葬者不筮宅練期十三月而練筮日筮尸視濯皆要經杖屨繩有司告具而後去杖筮日筮尸有司告事畢而後杖拜送賓祥二十五月而祥吉服而筮尸作栗主主人朝服縞冠素紕奉主入廟二十六月而禫

徒感

既禫復常曾子問於孔子曰三年之

喪弔乎孔子曰三年之喪練不羣立不旅行君子以禮飾情三年之喪而弔哭不亦虛乎是故雖功衰不弔期之喪十一月而練十三月而祥十五月而禫練則弔弔於鄉人哭而退不聽事焉功衰弔待事而執事小功總執事不與於禮相趨也出宮而退相揖也衰次而退相問也既封而退相見也反哭而退朋友虞祔而退諸侯葬必皮弁楊衰所弔雖葬主人必免主人未喪服則君亦不楊衰忌日忌日必哀稱諱君子以為終身之憂遭

喪雜禮曾子問於孔子曰並有喪如之何孔子曰葬先輕而後重其奠也先重而後輕禮也自啟及葬不奠行葬不哀次反葬奠而後辭於殯遂脩葬事其虞也先重而後輕禮也先葬者不虞祔待後事其葬服斬衰父喪未終而有母之喪其除喪也服其除服卒事反喪服諸父昆弟之喪亦然父母之喪將祭而昆弟死既殯而祭如同宮則雖臣妾葬而後祭主人及執事者之升降散等虞祔亦然自諸侯達諸士曾子問於孔子曰士大夫

有私喪可以除之矣而有君服焉如之何孔子曰有君服於身者不敢私服於是有過時而弗除也君之喪服除而後殷祭禮也曾子曰父母之喪弗除可乎孔子曰先王制禮過時弗舉禮也非弗能勿除也患其過於制也故君子過時不祭禮也曾子曰君薨既殯而臣有父母之喪如之何孔子曰歸居于家有殷事則之君所朝夕否曰君既啟而臣有父母之喪則如之何孔子曰歸哭而反送君曰君未殯而臣有父母之喪則如之何曰

歸殯反于君所有殷事則歸朝夕否大夫室老行事士則子孫行事大夫內子有殷事亦之君所朝夕否君之喪既引臣聞父母之喪遂既封而歸不俟子父母之喪既引及塗聞君薨遂既封改服而往君出疆以三年之戒以柩從君薨及其入也其殯服則子麻弁經音勉疏衰菲杖入自闕升自西階如小斂則子勉而從柩入自門升自阼階君大夫士一也君薨於路館復如國於道則以綏復於車左轂其轡有褱緇布裳帷素錦為屋而行

至於廟門說輶不毀牆遂入適所殯大夫士輶蒲裳布

帷葦席為屋至家說輶輶

市

車遂入至阼階說適所殯

大夫使他國卒於公館者復於私館者不復公館與公所為曰公館卿大夫士之家曰私館奔喪之禮始聞親喪哭盡哀問故又哭盡哀遂行見星而行見星而舍哭辟市朝望境而哭入門升自西階殯東坐哭盡哀括髮袒降堂東即位哭踊襲經于序東絞帶反位拜賓成踊送賓反位衆主人兄弟出哭止相者告就次於又哭三

哭皆括髮袒成踊三日成服於五哭拜賓送賓如初奔
喪者非主人則主人為之拜賓送賓齊衰以下奔者入
中庭北面哭免麻于序東即位袒與主人哭成踊於又
哭三哭皆免袒冠至尊也不居肉袒之禮故為之免以
代之也冠者不袒袒者必免母喪異於父者一括髮而
已括髮以麻免而以布齊衰惡筭以終喪奔不及殯者
先之墓北面坐哭盡哀主人即位於墓左婦人於右奔
者成踊盡哀括髮東即主所經絞帶哭成踊遂冠歸入

門左北面哭盡哀括髮袒成踊東即位他皆如前禮齊
衰以下不及殯先之墓西面哭免麻襲歸免袒他如前
禮聞喪不得奔則為位行禮如之若除喪而後歸則之
墓哭成踊東括髮袒經哭盡哀遂除至家不哭主人無
變於服哭不踊奔兄弟之喪先之墓而後之家為位而
哭所知之喪則哭於宮而後之墓奔齊衰者望鄉而哭
大功望門小功至門總麻即位而哭三年之喪則君夫
人歸夫人其歸也以諸侯之弔禮其待之也若待諸侯

然夫人至自闔門升自側階若在阼其他如奔喪坐哭
於殯東西面盡哀東擗即位與主人更踊婦人喪父母
者既練而歸期九月者既葬而歸大夫士父母之喪既
練而歸朔月忌日則歸哭於宗室諸父兄之喪既卒喪
而歸父不次於子兄不次於弟父不為衆子次於外哭
父之黨於廟母妻之黨於寢師於廟門外朋友於寢門
外所識於野張帷凡為位不奠哭天子九諸侯七卿大
夫五士三大夫哭諸侯不敢拜賓凡奔喪有大夫至袒

拜之成踊而后襲士則襲而后拜之凡異居聞兄弟之喪其始麻散帶經未服麻而奔喪及主人未成經也疏者與主人皆成之親者終其麻帶經之日數主人未除喪有兄弟自他國至則主人不免而為主凡喪服未畢有弔者則為位而哭拜踊遠兄弟之喪既除喪而后問免袒成踊拜賓則尚左手久而不葬者唯主喪者不除為兄弟既除喪已及其葬也反服其服總小功虞卒哭則免既葬而不報虞則雖主人皆冠及虞則皆免遠葬

者比反哭則皆冠及郊而後免反哭君弔雖不當免時也主人必免不散麻雖異國之君免也親者皆免

皇王大紀卷二十五

欽定四庫全書

皇王大紀卷二十六

宋 胡宏 撰

三王紀

康王

服制曰喪之有服也稱其惻怛悲悼之情也自高辛氏其服也哀後世聖人立制度識別親疎貴賤使足以成文理故服術有六一曰親親二曰尊尊三曰名四曰出入五曰長幼六曰從服服制有五一日斬衰二曰齊衰

三曰大功四曰小功五曰緦麻斬衰有二齊衰有四大

功四小功緦麻

闕

親親以三為五以五為九上殺下殺

旁殺而親畢從服有六有屬從有徒從有從有服而無

服有從無服而有服有從重而輕有從輕而重斬

不緝也

衰裳

上曰衰下曰裳

經

麻在首在腰皆曰經

杖絞帶

帶繩也

冠繩纓管屨三

年者子為父諸侯為天子臣為君父為長子為人後者

為所後父妻為夫妾為君父卒而為祖後者女子子在

室為父布總箭筭髻衰三年子嫁反在父之室為父三

年公士大夫之衆臣為其君布帶繩屨三年疏衰裳齊
牡麻經冠布纓削杖布帶疏屨三年者祖父卒而為祖
母後者父卒為母繼母如母繼母如母者配父也慈母
如母母為長子妾為君之長子為慈母後者為庶母可
也為祖庶母可也子游問於孔子曰喪慈母如母禮與
孔子曰非禮也古者男子外有傳內有慈母君命所使
教子者也何服之有昔者魯昭公少喪其母有慈母良
及其死也公欲喪之有司曰古之禮慈母無服公曰古

者天子練冠以燕居公弗忍也遂練冠以喪慈母喪慈母自魯昭公始也疏衰裳齊牡麻經冠布纓削杖布帶疏屨期者父在為母夫為妻出妻之子為母若為父後則不父卒繼母嫁從為之服報疏衰裳齊牡麻經冠布纓不杖麻屨期者為祖父母雖天子不降也為世父母叔父母大夫之適子為妻昆弟為衆子昆弟之子大夫之庶子為適昆弟適孫為人後者為其父母報女子子適人者為其父母昆弟之為父後者為繼父同居者為夫之君

姑姊妹女子子適人無主者姑姊妹報為君之父母妻
長子祖父母妾為女君婦為舅姑夫之昆弟之子公妾
大夫之妾為其子女女子子為祖父母大夫之子為世父
母叔父母子昆弟昆弟之子姑姊妹女子子無主者為
大夫命婦者唯子不報大夫為祖父母適孫為士者公
妾以及士妾為其父母疏衰裳齊牡麻經無受三月者
庶人為國君寄公為所寓丈夫婦人為宗子宗子之母
妻為舊君君之母妻大夫在外其妻長子為舊君為繼

父不同居者為曾祖父母大夫為宗子為舊君為曾祖
父母為士者女子子嫁者未嫁者為曾祖父母大功布
衰裳牡麻經無受者子女子子叔父姑姊妹昆弟夫之
昆弟之子女子子適孫之長殤中殤大夫之庶子為適
昆弟公為適子大夫為適子之長殤中殤其長殤皆九
月纓經經不繆垂其中殤七月不纓經十九以下為長
殤十五以下為中殤十一以下為下殤八歲以下為無
服之殤無服之殤以日易月殤而無服大功布衰裳牡

麻經纓布帶三月受以小功衰即葛九月者為姑姊妹
女子子適人者為從父昆弟為庶孫為適婦為人後者
為其昆弟女子子適人者為衆昆弟為姪丈夫婦人報
為夫之祖父母世父母叔父母夫之昆弟無服大夫為
世父母叔父母子昆弟昆弟之子為士者若尊同則不降公之
庶昆弟大夫之庶子為母妻昆弟皆為其從父昆弟之
為大夫者為夫之昆弟之婦女子適人者大夫之妾為
君之庶子女子子嫁者未嫁者為世父母叔父母姑姊

妹大夫大夫之妻大夫之子公之昆弟為姑姊妹女子

子嫁於大夫者君為姑姊妹女子子嫁於國君者

旁觀天子

諸侯無服

小功總衰裳牡麻經既塋除之者諸侯之大夫為

天子小功布衰裳澡麻帶經五月者為叔父及適孫及

昆弟之下殤大夫庶子為適昆弟及姑姊妹女子子之

下殤為人後者為其昆弟從父昆弟之長殤為夫之叔

父之長殤昆弟之子女子子夫之昆弟之子女子子之

下殤為姪庶孫丈夫婦人之長殤大夫公之昆弟大夫

之子為其昆弟庶子姑姊妹女子子之長殤大夫之妾
為庶子之長殤大功之殤中從上小功之殤中從下君
之適長殤車三乘君之庶長殤大夫之適長殤車一乘
曾子問曰下殤土周塋于園遂輿機而往塗邇故也若
墓遠則如之何孔子曰昔者史佚有子而死下殤也墓
遠召公曰何以不棺斂於宮中史佚曰吾敢乎哉召公
言於周公周公曰豈不可史佚行之為殤後者以其服
服之除殤之喪者其祭也必立小功布袞裳牡麻經即

葛五月者從祖祖父母從祖父母報從祖昆弟從父姊妹孫適人者為人後者為其姊妹適人者為外祖父母從母丈夫婦人報夫之姑姊妹娣姒婦報大夫大夫之子公之昆弟為從父昆弟庶孫姑姊妹女子子適士者大夫之妾為庶子適人者庶婦君母之父母從母君子子為庶母慈已者總麻三月者為族曾祖父母族祖父母族父母族昆弟庶孫之婦庶孫之中殤從祖姑姊妹適人者報從祖父從祖昆弟之長殤外孫從父昆弟姪

之下殤夫之叔父之中殤下殤從母之長殤報庶子為父後者為其母士為庶母貴臣貴妾乳母從祖昆弟之子曾孫父之姑從母昆弟甥壻妻之父母姑之子舅之子夫之姑姊妹之長殤夫之諸祖父母報君母之昆弟從父昆弟之子之長殤昆弟之孫之長殤為夫之從父昆弟之妻士為妾之有子者何謂上殺父三年祖期則曾祖宜大功高祖宜小功而皆齊衰三月者不敢以大功小功旁親之服加乎至尊也三月則殺矣此所謂上

殺何謂下殺適子三年庶子期適孫大功則曾孫宜五月而與玄孫皆總麻三月者曾孫服曾祖三月曾祖報之亦三月以其卑也故服總麻此所謂下殺何謂旁殺服祖期則世叔父宜大功以其與父一體故加以期從世叔則疏矣故為之小功族世叔又疏矣故為之總麻此自父而旁殺者也祖之兄弟小功曾祖兄弟總麻高祖兄弟無服此自祖而旁殺者也同父至親期同祖為從大功同曾祖為再從小功同高祖三從總麻此自兄

弟而旁殺者也父為子期為兄弟之子宜九月而亦期者以其猶子而進之也從兄弟之子小功再從兄弟之子總麻此自子而旁殺者也祖為孫大功兄弟之孫小功從兄弟之孫總麻此自孫而旁殺者也公子之妻為其皇姑齊衰此從輕而重者也為妻之父母總麻此從重而輕者也公子之妻為公子之外兄弟總麻此從無服而有服者也公子為其妻之父母無服此從有服而無服者也王為三公六卿錫衰為諸侯總衰為大夫士

疑衰其首服皆弁經公為卿大夫錫衰以居出亦如之
當事則弁經大夫相為亦然為其妻往則服出則否練
冠麻衣緇緣公子為其母也緇冠葛經帶麻衣緇緣公
子為其妻也皆既塋除之宗子母在為妻禫與諸侯為
兄弟者服斬君之母非夫人則羣臣無服唯近臣從君
服其餘從而服不從而稅君雖未知喪臣服已從服者
所從亡則已屬從者所從雖沒服為母之君母母卒則
不服為君母後者君母卒則不為君母之黨服妾從女

君而出則不為女君之子服女君死則妾為女君之黨服攝女君則不為先女君之黨服生不及祖父母諸父昆弟而父稅喪已則否降而在總小功者則稅之為君之父母妻長子君已除喪則不稅為慈母之父母無服大夫公之昆弟大夫之子於兄降一等為人後者於兄弟降一等報於所為後之兄弟之子若子君之所為兄弟服室老降一等夫之所為兄弟服妻降一等庶子為後者為其外祖父母從母舅無服宗子孤為殤大功衰

小功衰皆三月親則月筭如邦人童子唯當室總免而杖世子不降妻之父母其為妻也與大夫之適子同大夫降其庶子其孫不降其父夫為人後者其妻為舅姑大功宗子母在為妻禫為慈母後者為庶母可也為祖庶母可也為父母妻長子禫庶子在父之室則為其母不禫為父後者為出母無服無服也者喪者不祭故也適婦不為舅後者則姑為之小功大夫為其父母兄弟之未為大夫者之喪服如士服士為其父母兄弟之為

大夫者之喪服如士服大夫之適子服大夫之服大夫之庶子為大夫則為其父母服大夫服其位與未為大夫者齒君為天子三年夫人如外宗之為君世子不為天子服大夫之適子為君夫人太子如士服君之母非夫人則羣臣無服唯近臣及僕騾乘從服唯君所服服也庶子在父之室則為其母不禪庶子不以杖即位父不主庶子之喪則孫以杖即位可也父為長子杖則其子不以杖即位或曰父不為主而杖者姑在為夫杖母

為長子削杖女子子在室為父母其主喪者不杖則子
一人杖君主夫人妻太子適婦之喪諸侯於異國之臣
則其君為主凡喪父在父為主父沒兄弟同居各主其
喪親同長者主之不同親者主之凡主兄弟之喪雖疏
亦虞之大夫不主士之喪士之子為大夫則其父母弗
能主也使其子主之無子則為之置後妻之昆弟為父
後者死哭之適室子為主袒免哭踊夫入門右父在哭
於妻之室非為父後者哭諸異室姑姊妹其夫死而夫

黨無兄弟使夫之族人主之妻之黨雖親弗主夫若無族則四鄰主之無四鄰則里尹主之喪有無後而無主男主必使同姓婦主必使異姓改塋總為朋友麻斬衰不說經帶居倚廬寢苦枕塊婦人則否容貌若苴纍纍顛顛瞿瞿繭繭哭若往而不反唯而不對三日不食既殯食粥既虞卒哭柱楣翦屏芊翦不納疏食水飲期而小祥居堊室寢有席不與人居食有菜葉又期而大祥食有醯醬中月而禫禫而從御飲醴酒吉祭而復寢齊

衰貌若泉哭若往而反對而不言二日不食疏食水飲
不食菜菹居堊室芻翦不納大功貌若止哭三曲而偯
言而不議一日不食食不醯醬寢有席小功總麻容貌
可也哀容可也再不食可也議而不及樂不飲醴酒牀
可也孔子曰伯母叔母疏衰踊不絕地姑姊妹之大功
踊絕於地知此者由文矣哉布八十縷為一升斬衰三
升齊衰四升五升六升大功七升八升九升小功十升
十一升十二升總麻十五升去其半有事其縷無事其

布也苴經大搗五分而去一以為帶杖大如要經齊衰之經斬衰之帶也斬衰既虞卒哭受以成布六升冠七升疏衰受以成布七升冠八升去麻服葛葛帶三重期而祭小祥練冠練衣黃裏繚緣履無絢角填鹿裘衡長祛祛裼之可也要經不除男子除乎首婦人除乎帶除服者先重者易服者先輕者又期而祭大祥期服素縞麻衣中月而禫祭禫而織無所不佩至親以期斷加隆焉使倍之故再期也三年以為隆總小功以為殺期九

月以為間上象於天下法於地中則於人人之所以羣居和壹之理盡矣三年之喪二十五月而畢哀痛思慕若駟之過隙然而遂之是無窮也故親喪外除兄弟之喪內除期而祭禮也期而除喪道也祭不為除喪也三年之喪既練矣有期之喪既塋矣則帶其故葛經期之經服其功衰有大功之喪亦如之小功無變也麻之有本者變三年之葛既練遇麻斷本者於免經之既免去經每可以經必經既經則去之小功不易喪之練冠如

免則經其總小功之經因其初葛帶總之麻不變小功之葛小功之麻不變大功之葛以有本為稅殤長中變三年之葛終殤之月筭而反三年之葛是非重麻為其無卒哭之稅下殤則否父大功小功之末可以冠子可以嫁子可以娶婦已雖小功既卒哭可以娶妻下殤之小功則不可三年而後塋者必再祭其祭之間不同時而除喪大功者主人之喪有三年者則必為之再祭朋友虞祔而已虞祭不致爵練祭不旅酬祥祭無筭爵小

祥之祭主人之酢也。瘠之衆賓兄弟啐之大祥主人啐之衆賓兄弟飲之可也。凡待祭喪者告賓祭薦而不食餽餘不祭父不祭子夫不祭妻居喪之禮毀瘠不形視聽不衰升降不由阼階出入不當門隧孔子曰首有瘡則沐身有瘍則浴病則飲酒食肉疾止復初毀瘠為病君子弗為也。毀而死君子謂之無子五十不致毀六十不毀七十惟衰麻在身飲酒食肉處於內三年之喪如或遺之酒肉則受之必三辭衰絰而受之如君命則不

敢辭受而薦之喪者不遺人人遺之雖酒肉弗受也從父兄弟以下既卒哭遺人可也有服人召之食不往大功以下既葬適人其黨食之則食非其黨則不食疏衰之喪既葬人請見之則見不請見人小功請見人可也大功不以執摯唯父母之喪不辟涕而見人父母之喪三年不從政齊衰大功之喪三月不從政將徙於諸侯三月不從政自諸侯來徙家期不從政又曰三年之喪祥而後從政期之喪卒哭而從政九月之喪既葬而從

政小功總之喪既殯而從政居喪未塋讀喪禮既塋讀祭禮喪復常讀樂章居喪不言樂祭事不言凶凡見人無免絰雖朝於君無免絰唯公門有稅齊衰既塋與人立君言王事不言國事大夫士言公事不言家事君既葬王政入於國既卒哭而服王事大夫士既塋公政入於家既卒哭弁絰金革之事無辟也既練君謀國政大夫士謀家事適墓不登壘助塋必執紼臨喪不笑揖人必違其位望柩不歌入臨不翔當食不歎鄰有喪春

不相里有殯不巷歌適墓不歌哭日不歌送喪不由徑
送塋不辟塗潦臨喪則必有哀色執紼不笑臨樂不歎
介冑則有不可犯之色故君子戒慎不失色於人君子
已孤不更名已孤暴貴不為父作諡

皇王大紀卷二十六

欽定四庫全書

皇王大紀卷二十七

宋 胡宏 撰

三王紀

康王

祭祀曰自包義氏教民養牲以薦神祇後聖有作為政
於天下必本諸天殺以降命命降於社之謂殺地降於
祖廟之謂仁義降於山川之謂興作降於五祀之謂制
度有天下者祭百神是故天子祭天地祭四方祭山川

祭五祀歲徧諸侯方祀祭山川祭五祀歲徧在其地則祭之亡其地則不祭大夫祭五祀歲徧士祭其先凡祭有其廢之莫敢舉也有其舉之莫敢廢也非其所祭而祭之名曰淫祀淫祀無福郊聖人因天事天因地事地因名山升中于天因吉土以饗帝于郊是故天子適四方先柴郊之祭也迎長日之至也大報天而主日配以月夏后氏祭其閭殷人祭其陽周人祭日以朝及闇祭日於壇祭月於坎以別幽明以制上下祭日於東祭月

於西以別內外以端其位兆於南郊就陽位也掃地而祭於其質也器用陶匏以象天地之性也於郊故謂之郊牲用騂尚赤也特牲用犢貴誠也郊之用辛也周之始郊日以至卜郊受命於祖廟作龜于禰宮尊祖親考之義也卜之日王立於澤親聽誓命受教諫之義也孔子曰昔三代明王皆事天地之神明無非卜筮之用不敢以其私褻事上帝是故不犯日月不違卜筮卜筮不相襲也大事有時日小事無時日有筮外事用剛日內

事用桑日不違龜筮獻命庫門之內戒百官也大廟之命戒百姓也祭之日王皮弁以聽祭報示民嚴上也喪者不敢哭凶服者不敢入國門汜埽反道鄉為田燭弗命而民聽上祭之日王被袞以象天戴冕藻十有二旒則天數也乘素車貴其質也旂十有二旒龍章而設日月以象天也天垂象聖人則之郊所以明天道也帝牛不吉以為稷牛帝牛必在滌三月稷牛唯具萬物本乎天人本乎祖此所以配上帝也郊之祭也大報本反始

也啟蟄而郊祈穀于上帝也禮之近人情者非其至者也郊血大饗腥三獻爛一獻孰至敬不享味而貴氣臭也是故至敬無文父黨無容祀帝於郊敬之至也至敬不壇故掃地而祭社社祭土而主陰氣也土發而社助時也君南鄉於北牖下答陽之義也日用甲用日之始也天子大社必受霜露風雨以達天地之氣也是故喪國之社屋之不受天陽也亳社北牖使陰明也社所以神地之道也地載萬物天垂象取財於地取法於天是

以尊天而親地也故教民美報焉家主中雷而國主社
示本也唯為社事單出里唯為社田國人畢作唯社丘
乘共粢盛所以報本反始也季春出火為焚也然後簡
其車賦而歷其卒伍而君親誓社以習軍旅左之右之
坐之起之以觀其習變也而流示之禽而豔諸利以觀
其不犯命也求服其志不貪其得故以戰則克以祭則
受福天子社稷皆太牢諸侯社稷皆少牢

論曰成身莫大於禮禮莫重於祭祀祀之禮所

以立吾誠也鬼神之為物非他即吾之誠是矣
王者繼天而為之子獨主萬化故祭天於郊祭
地於社祭名山大川五祀各於其方後世禮失
其傳論者不本於性命故秦禮八神以求僊人
一曰天二曰地三曰兵四曰陰五曰陽六曰月
七曰日八曰四時漢祠太一求神僊方士曰天神
貴者太一太一佐曰五帝是皆不知鬼神之情
狀方士家妄作儒者不取也及歷攷儒者論祭

天地之禮於天則有昊天上帝有五方帝有感
生帝夫土不可以有二王而天可以有七帝乎
於地則或立方澤或立方丘或立北郊與天敵
體是猶家有二主也且子事父母父在為母齊
衰期不敢亢其父者尊無二上故也王者父事
天母事地而可崇地以抗天乎是故夫獨制義
於其家而家道正矣君獨出令於其國而天下
定矣天獨健而無息地道順承而無成而太極

立矣王者以父事天立誠而精一其德故兆於
南郊埽地而祭者昊天上帝而已天言其氣帝
言其性也社祭土所以神地道也名山大川者
寶貨財用之所出而四方之所依據也五祀者
穀與水火金木也人所日用莫過五材不是之
報而顧報行與門戶舉失輕重豈禮也哉禮之
所貴貴其義也是故王者祭天以柴燎牲使氣
上達語其精誠則謂之禋語其感格則謂之類

語其方兆則謂之郊指事異名其實一也周禮
乃專以禋祀歸之上帝以實柴歸之日月星辰
以禋燎歸之司中司命風師雨師不以日月星
辰一于天而以柴燎分為三多見其妄也又司
中司命風師雨師說者以為星也上文既曰以
實柴祀日月星辰則宜兼之矣夫日月猶可兼
於星辰豈此四星而不可兼於日月乎其文乖
次失禮之義蓋劉歆

下
逸

宗廟生曰父曰母曰妻死曰考曰妣曰嬪祭王父曰皇祖考王母曰皇祖母妣父曰皇考母曰皇妣夫曰皇辟禮有五經莫重於祭祭者自中出生於心也賢者之祭也必受其福福者備也無所不順之謂備忠臣以事其君孝子以事其親其本一也子之事親有三道焉養則觀其順也喪則觀其哀也祭則觀其敬而時也天子七廟左三昭右三穆與太祖之廟而七諸侯五廟山節藻梲復廟重檐刮楹達鄉反坫出尊崇坫康圭疏屏天子之

廟飾也春祠夏禴秋嘗冬烝夏殷宗廟之祭春曰禘夏曰禘禮不王不禘禘王者之大祭也王者禘其祖之所自出時祭曰禘則亂名也於是春更曰祠夏更曰禴諸侯祫及其太祖大夫士有大事省於君子祫及其高祖三年一禘五年一祫大夫三廟士一廟有田則祭無田則薦凡祭祀張旅幕張尸次祭成喪者必有尸孫為王父尸所使為尸者於祭者子行也父北面而事之所以明子事父之道也孫幼則使人抱之無孫則取於同姓

之適孔子曰尸冕弁而出卿大夫士皆下之君知所以
為尸者則自下之尸必式乘必以几必有前驅君與尸
行接武大夫繼武士中武徐趨皆用是疾趨則欲發而
手足毋移及時將祭君子乃齊散齊七日致齊三日齊
者不樂不弔不敢散其志也精明之至然後可以交神
明是故先期旬有一日宮宰宿夫人夫人亦散齊七日
致齊三日君子生則敬養死則敬享致愛則存致慈則
著唯聖人為能饗帝孝子為能饗親三月繫七日齊三

日宿慎之至也君致齊於外夫人致齊於內然後會於太廟鋪筵設同几為依神也天道至教聖人至德廟堂之上壘尊在阼犧尊在西廟堂之下縣鼓在西應鼓在東君西酌犧象夫人東酌壘尊君袞冕立於阼夫人副褱立於東房夫祭必夫婦親之所以備外內之官也官備則具備水草之菹陸產之醢三牲之俎八簋之實昆蟲之異草木之實天之所生地之所長苟可薦者莫不咸在示盡物也外則盡物內則盡志此祭之心也君迎

牲而不迎尸別嫌也尸在廟門外則疑於臣在廟中則全於君君在廟門外則疑於君入廟門則全於臣全於子是故不出者明君臣之義也崇事宗廟社稷則子孫順孝祭者教之本也是故君子之事君也必身行之所不安於上則不以使下所惡於下則不以事上非諸人行諸已非教之道也君執圭瓚裸尸大宗執璋瓚亞裸及迎牲君執紉卿大夫贊幣而從士執芻宗婦執盞從夫人奠盞薦流水君執鸞刀羞膋君獻尸夫人薦豆執

校執醴授之執鐙君親制祭夫人薦盞君親割牲夫人薦酒卿大夫從君命婦從夫人尸酢夫人執柄夫人受尸執足夫婦相授受不相襲處酢必易爵明夫婦之別也洞洞乎其敬也屬屬乎其忠也勿勿乎其欲其饗之也納牲詔於庭血毛詔於室羹定詔於堂三詔皆不同位蓋道求而未之得也設祭于堂為祊乎外故曰於彼乎於此乎或曰君牽牲穆答君卿大夫序從既入廟門麗于碑卿大夫袒而毛牛尚耳鸞刀以剗取腓臂乃退

爛祭祭腥而退敬之至也又曰玄酒在室醴醢在戶粢醢在堂澄酒在下陳其犧牲備其鼎俎列其琴瑟管磬鼓鐘脩其祝嘏以降上神與其先祖以正君臣以篤父子以睦兄弟以齊上下夫婦有所是謂承天之祜作其祝號玄酒以祭薦其血毛腥其俎孰其穀與其越席疏布以冪衣其漦帛醴醢以獻薦其燔炙君與夫人交獻以嘉魂魄是謂合莫然後退而合烹體其犬豕牛羊實其簋簋籩豆鉶羹祝以孝告嘏以慈告是謂大祥此禮

之大成也又曰及八舞君執干戚就舞位君為東上冕而總干率其羣臣以樂皇尸禮交動乎上樂交應乎下和之至也禮也者反其所自生樂也者樂其所自成是故聖王制禮以節事脩樂以道志夫祭有三重焉獻之屬莫重於裸聲莫重於聲歌舞莫重於武宿夜此周道也凡三道者所以假於外而以增君子之志也有事於太廟則羣昭羣穆咸在凡賜爵昭為一穆為一昭與昭齒穆與穆齒及羣有司皆以齒所以別父子遠近長幼

親疏之序而無亂也古者明君爵有德祿有功必於大廟故祭之日一獻君降立于阼階之南南鄉所命北面史由君右執策命之再拜稽首受書以歸而舍奠於其廟此爵賞之施也凡為俎者以骨為主骨有貴賤殷人貴髀周人貴肩凡前貴於後俎者所以明祭之必有惠也是故貴者取貴骨賤者取賤骨貴者不重賤者不虛示均也羔豚而祭百官皆足太牢而祭不必有餘惠均則政行事成而功立矣餼者祭之末也善終者如始餼

其是已君子曰尸亦餽鬼神之餘也惠術也可以觀政
矣是故尸謖君與卿四人餽君起大夫六人餽大夫起
士八人餽士起各執其具以出陳於堂下百官進徹之
所以別貴賤之等而興施惠之象也是故以四簋黍見
其脩於廟中也廟中者竟內之象也故曰可以觀政矣
又曰尸飲三君洗玉爵獻卿尸飲七以瑤爵獻大夫尸
飲九以散爵獻士及羣有司是故貴者獻以爵一賤者
獻以散五尊者舉觶三卑者舉角四明尊卑之等也升煇

胞翟聞者吏之至賤者也尸又至尊以至尊既祭之末
不忘至賤而以其餘畀之此之謂上下之際又曰有虞
氏之祭也尚用氣血腥爛祭用氣也殷人尚聲臭味未
成滌蕩其聲樂三闋然後出迎牲周人尚臭灌用鬯臭
鬱合鬯臭陰達於淵泉灌以圭璋用玉氣也既灌然後
迎牲致陰氣也蕭合黍稷臭陽達於牆屋故既奠然後
燂蕭合羶薌凡祭慎諸此菟氣歸于天形鬼降于地故
祭求諸陰陽之義也殷人先求諸陽周人先求諸陰詔

祝於室坐尸於堂用牲於庭升首於室直祭祝于主索
祭祝于祊不知神之所在於彼乎於此乎或遠諸人乎
祭于祊尚曰求諸遠者歟是故詔祝於室而出于祊此
神明之道也有虞氏祭首夏后氏祭心殷祭肝周祭肺
血毛告幽全之物也貴純之道也血祭盛氣也祭肺肝
心貴氣主也祭黍稷加肺祭齊加明水報陰也取腍腎
燔燎升首報陽也明水沅齊貴新也其謂之明水也由
主人之潔著此水也縮酌用茅明酌也醴酒沅于清汁

獻泔于醢酒凡泔新之也君再拜稽首肉袒親割敬之
至也祭稱孝子孝孫以其義稱也稱曾孫某謂國家也
祭祀之相主人自致其敬盡其嘉而無與讓也腥肆爛
臠祭豈知神之所饗主人自盡其敬而已矣舉犖角詔
妥尸古者尸無事則立有事而後坐也夏立尸而卒祭
殷坐尸周旅酬六尸尸神象也祝將命也凡祭宗廟之
禮牛曰一元大武豕曰剛鬣豚曰腍肥羊曰柔毛雞曰
翰音犬曰羹獻雉曰疏趾兔曰明視脯曰尹祭橐魚曰

商祭鮮魚曰脰祭水曰清滌酒曰清酌黍曰鄉合梁曰
鄉其稷曰明粢稻曰嘉蔬韭曰豐本鹽曰鹹醢玉曰嘉
玉幣曰量幣犧尊疏布冪禪杓大路素而越席黃目鬱
氣之上尊也黃者中也目者氣之清明者也言酌於中
而清明於外也醢醢之美而煎鹽之尚貴天產也割刀
之用鸞刀之貴貴其義也聲和而後斷也酒醴之美玄
酒明水之尚貴五味之本也黼黻之美疏布之尚反女
功之始也莞簟之安而蒲越橐鞾之設明之也大羹不

和貴其質也大圭不琢美其質也丹漆雕幾之美素車
之乘尊其樸也貴其質而已矣所以交於神明者不敢
同於所安褻之義也君子曰禮之近人情者非其至者
也郊血大饗腥三獻爛一獻孰是故君子之於禮也非
作而致其情也此有由始也是故七介以相見也不然
則已慤三辭三讓而至不然則已蹙故禮有擯詔樂有
相步溫之至也禮也者反本脩古不忘其初者也故凶
事不詔朝事以樂孔子曰七日戒三日齋承一人焉以

為尸過之者趨以教敬也醴酒在室醢酒在堂澄酒在
下示民不淫也尸飲三衆賓飲一示民有上下也因其
酒肉聚其宗族教民睦也故堂上觀乎室堂下觀乎上
是故見事鬼神之道焉見君臣之義焉見父子之親焉
見夫婦之別焉見長幼之敘焉見上下之際焉見貴賤
之等焉見親疏之殺焉見爵賞之施焉見政事之均焉
是之謂十倫記曰夏后氏尚明水殷尚醴周尚酒尊有
虞氏曰泰夏后氏曰山壘殷曰著周曰犧象爵夏后氏

以琖殷以箎周以爵灌尊夏后氏以雞彝殷以箎周以
黃目勺夏后氏以龍勺殷以疏勺周以蒲勺鼓夏后氏
之鼓足殷楹鼓周縣鼓夏后氏之龍簨簴殷之崇牙周
之壁翬敦有虞氏之兩敦夏后氏之四琕殷之六瑚周
之八簋俎有虞氏以梲夏后氏以嶽殷以柎周以房豆
夏后氏揭豆殷玉豆周獻豆凡天子以犧牛諸侯以肥
牛大夫以羊豕天地之牛角繭栗宗廟之牛角握賓客
之牛角尺諸侯無故不殺牛大夫無故不殺羊士無故

不殺犬豕庶人薦於寢春薦韭夏薦麥秋薦黍冬薦稻
韭以卵麥以魚黍以豚稻以鴈庶人無故不食珍庶羞
不踰牲燕衣不踰祭服寢不踰廟祭豐年不奢凶年不
儉凡喪從死者祭從生者父為士子為天子諸侯則祭
以天子諸侯其尸服以士父為天子諸侯子為士祭以
士其尸服以士祭容貌顏色如見所祭者成廟則釁之
以羊與鷄成寢則考之而不釁凡宗廟之器其名者成
則釁之以緘豚釁者交神明之道也臨祭不惰祭服敝

則焚之祭器敝則埋之龜策敝則埋之牲死則埋之為人祭曰致福為已祭而致膳於君子曰膳祔練曰告凡膳告於君子主人展之以授使者于阼階之南南面再拜稽首送反命主人又再拜稽首其禮太牢則以牛左肩臂臠折九箇少牢則以羊左肩七箇牷豕則以豕左肩五箇君子將營宮室宗廟為先廡庫為次居室為後凡家造祭器為先犧賦為次養器為後無田祿者不設祭器有田祿者先為祭服為宮室不斬於丘木曾子問

於孔子曰天子嘗禘郊社五祀之祭簋簠既陳天子崩
后之喪則如之何孔子曰廢如當祭而日食太廟火則
如之何曰接祭而已矣如牲至未殺則廢天子崩未殯
五祀之祭不行既殯而祭其祭也尸入三飯不侑醑不
酢而已矣自啟至于反哭五祀之祭不行已葬而祭祀
畢獻而已諸侯之祭社稷俎豆既陳聞天子崩后之喪
君薨夫人之喪則廢自薨比至于殯自啟至于反哭奉
帥天子大夫之祭鼎俎既陳籩豆既設天子崩后之喪

君薨夫人之喪君之太廟火日食三年之喪齊衰大功
皆廢外喪自齊衰以下行也其齊衰之祭也尸入三飯
不侑醕不酢而已矣大功酢而已矣小功緦室中之事
而已矣士之所以異者總不祭所祭於死者無服則祭
大夫士將與祭於公既視濯而父母死則猶是與於祭
也次於異宮既祭釋服出公門哭而歸入奔喪禮如未
視濯則使人告告者反而後哭如諸父昆弟姑姊妹之
喪既宿則與祭卒事而後歸如同宮則次于異宮卿大

夫將為尸於公受宿矣而有齊衰內喪則出舍于公館以待事大夫冕而祭於公弁而祭於已士弁而祭於公冠而祭於已士弁而親迎然則士弁而祭可也君子之祭也必身親蒞之有故則使人可也祭不欲數數則煩煩則不敬祭不欲疏疏則急急則忘是故霜露既降君子履之必有悌愴之心雨露既濡君子履之必有怵惕之心君子合諸天道春禴秋嘗春饗孤子秋食耆老其義一也凡飲養陽氣也食養陰氣也樂以迎來哀以送

往故饗禴有樂而食嘗無樂陰陽之義也禮樂曰樂者
音之所由生也凡音之起由人心之感於物也感於物
而動故形於聲聲相應故生變變成方謂之音比音而
通於倫理謂之樂是故其哀心感者其聲噍以殺其樂
心感者其聲啍以緩其喜心感者其聲發以散其怒心
感者其聲粗以厲其敬心感者其聲直以廉其愛心感
者其聲和以柔六者非性也感於物而後動故先王慎
所以感之者故禮以道其志樂以和其聲政以一其行

刑以防其姦禮樂刑政其極一也是故治世之音安以樂其政和亂世之音怨以怒其政乖亡國之音哀以思其民困聲音之道與政通矣宮為君商為臣角為民徵為事羽為物五者不亂則無怙慝之音矣宮亂則荒其君驕商亂則陂其臣壞角亂則憂其民怨徵亂則哀其事勤羽亂則危其財匱五者皆亂迭相陵謂之慢如此則國之滅亡無日矣是故知聲者可與言音知音者可與言樂知樂則幾於禮矣樂之隆非極音也食饗之禮

非致味也清廟之瑟朱弦而疏越一倡而三歎有遺音者矣大饗之禮尚玄酒而俎腥魚大羹不和有遺味者矣是故先王之制禮樂也非以極口腹耳目之欲也將以教民平好惡而反人道之正也人生而靜天之性也感物而動性之欲也物至知知然後好惡形焉好惡無節於內知誘於外不能反躬天理滅矣於是有悖逆詐偽之心有淫佚作亂之事是故先王制禮樂人為之節禮節民心樂和民聲仁以愛之義以正之如此則民治

行矣樂由中出禮自外作樂由中出故靜禮自外作故
文大樂必易大禮必簡易故與天地同和簡故與天地
同節和故百物不失節故祀天祭地明則有禮樂幽則
有鬼神如此則四海之內合敬同愛矣禮者殊事合敬
者也樂者異文合愛者也禮樂之情同故明王以相沿
也故事與時並名與功偕鐘鼓管磬羽籥干戚樂之器
也屈伸俯仰綴兆舒疾樂之文也簋簠俎豆制度文章
禮之器也升降上下周旋裼襲禮之文也知禮樂之情

者能作識禮樂之文者能述樂者天地之和也禮者天地之序也和故百物皆化序故羣物皆別樂由天作禮以地制過制則亂過作則暴明於天地然後能興禮樂也王者功成作樂治定制禮其功大者其樂備其治辯者其禮具干戚之舞非備樂也孰亨而祀非達禮也五帝殊時不相沿樂三王異世不相襲禮敦樂而無憂禮備而不偏者其惟大聖乎天高地地下萬物散殊而禮制行矣流而不息合同而化而樂興焉春作夏長仁也秋

斂冬藏義也仁近於樂義近於禮樂者敦和率神而從
天禮者別宜居鬼而從地故聖人作樂以應天制禮以
配地禮樂明備天地官矣化不時則不生男女無辨則
亂升天地之情也樂著太始而禮居成物著不息者天
也著不動者地也一動一靜者天地之間也昔者舜作
五絃之琴以歌南風夔始制樂以賞諸侯德盛而教尊
五穀時熟然後賞之以樂故其治民勞者其舞行綴遠
其治民逸者其舞行綴短故觀其舞知其德聞其謚知

其行也故酒食者所以合歡也樂者所以象德也禮者所以綴淫也先王有大事必有禮以哀之有大福必有禮以樂之哀樂之分皆以禮終樂也者聖人之所樂也而可以善民心故先王著其教焉土敝則草木不長水煩則魚鼈不大氣衰則生物不遂世亂則禮慝而樂淫是故其聲哀而不莊樂而不安慢易以犯節流湏以忘本廣則容姦狹則思欲感條暢之氣而滅平和之德君子反情以和其志比類以成其行姦聲亂色不留聰明

淫樂慝禮不接心術惰慢邪辟之氣不設於身體使耳目鼻口心知百體皆由順正以行其義然後發以聲音而文以琴瑟動以干戚飾以羽旄從以簫管清明象天廣大象地終始象四時周旋象風雨五色成文而不亂八風從律而不姦百度得數而有常小大相成終始相生倡和清濁迭相為經故樂行而倫清耳目聰明血氣和平移風易俗天下皆寧故曰樂者樂也君子樂得其道小人樂得其欲以道制欲則樂而不亂以欲忘道則

惑而不樂樂者心之動也聲者樂之象也君子動其本
樂其象然後治其文采節奏是故三鼓以警戒三步以
見方再始以著往復亂以飭歸奮疾而不拔極幽而不
隱獨樂其志備舉其道樂行而民鄉方可以觀德矣夫
樂者樂也人情之所不能免也樂必發於聲音形於動
靜故先王制雅頌之聲以道之使其聲足樂而不流使
其文足論而不息使其曲直繁瘠廉肉節奏足以感動
人之善心而已矣不使放心邪氣得接焉故聽其雅頌

之聲志意得廣焉執其干戚習其俯仰詘伸容貌得莊焉行其綴兆要其節奏行列得正焉進退得齊焉故樂者天地之命中和之紀人情之所不能免也樂也者情之不可變者也禮也者理之不可易者和順積中而英華發外者也黃鍾大呂弦歌干揚者樂之末節也故童者舞之鋪筵席陳尊俎列蓬豆以升降為禮者禮之末節也故有司掌之樂師辨乎聲詩故北面而弦宗祝辨乎宗廟之禮故後尸商祝辨乎喪禮故後主人是故

德成而上藝成而下行成而先事成而後是故先王有上有下有先有後然後可以有制於天下也君子曰禮樂不可斯須去身致樂以治心則易直子諒之心油然而生生則樂樂則安安則久久則天天則神天則不言而信神則不怒而威致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而慢易之心入之矣樂極和禮極順內和而外順則民瞻其顏色而不與爭也望其容貌而衆不生慢

易焉樂也者動於內者也禮也者動於外者也故禮主其減樂主其盈禮減而進以進為文樂盈而反以反為文禮減而不進則銷樂盈而不反則放故禮有報而樂有反禮得其報則樂樂得其反則安禮之報樂之反其義一也

皇王大紀卷二十七